

وبشتاق لك

وبشتاق لك وتشتاق لي

ويفضل حبنا باقي

تفوت أيام وتنده لي

أدفي هواك بأشواقِي

وأجيلك من بلاد تانية

واعد اللحظة والثانية

عشان احضن هوا قلبك

و أدوب وياك ف نار حبك

و امتع روعي بالضحكة

مهو انت رفيقي ف السكة

وسكتنا نهارها طويل

ويا ما عشنا اوقاتنا نغني لها

نقول مواويل

ندندن فيها مع رشدي

علي الرملة

وثومة كات تقول الليل

وكنت ساعات تغني وديع

(دار يا دار يادار)

ك إن القلب كان خايف

بان الحب يوم هيضيع

وان فراقنا هيطول

وان نهارنا هيليل

وفينا حد كان هيبيع

واهي عدت....

وهديت كل أوقاتنا

وفكرنا ف عِشرتنا
لَقينا العِشرة غلبتنا
تضم ف تاني سكتنا
تطبطب ع الجراح بحنين
تزود حبنا تاني بألف دليل
نهاية القول ..

مفيش قلبين شبكهم رب كل الكون
بحب جميل

يفرقهم قدر مكتوب
ولا مسافات ولا خلافات
تخلي الحب لحظة يتوب
وانا وانت

حكاية حب تتغني
يدوروا بيها ف الملكوت

واديننا لسة عايشينها
صحيح بسكوت ومن غير صوت
ولكن حبنا باقى
ويوم عن يوم بيكبر جوه ف قلوبنا
لحد الموت
لحد م أموت !!